



Las trais personas che han fatg part da la giuria: Arnold Cramer, Felix Dietrich e Rudolf Mirer (da san.).

FOTOS G. N. STIGIER

«L'acziun porta segir fritgs»

Gastro Grischun e hotelleriessuisse Grischun

DA GION NUTEGN STIGIER / ANR

■ **A la gastronomia mancan forzas giuunas. Suentar nov mais è ida a fin la campagna cun las scolas che las duas organisaziuns han lantschà per far pli enconuscent las professiuns en la gastronomia. 1200 scolaras da 65 classes èn sa participads a la concurrenza.** Da chattar persunal indigen che lavura en in otel u restaurant e oz betg uschè simpel. Da chattar persunas giuunas che fan in emprendissadi en la gastronomia è anc bler pi difficil. I dat plis motivs pertge che giuuns e giuunas na vulan betg far in emprendissadi da cuschinier, camerier ubain assistenta d'otel. En ils otels sco er en ils restaurants è da lavurar la fin d'emna, il temp da lavur è indifferent e savens cuzza il servetsch fin suenter mesanotg. Oz è dentant reglà tut quai cun il contract collectiv da lavur. Il temp da lavur è prescrit, la paja minimala er ed er quai che pertutga ils dis libers e las vacanzas. Tuttina mancan er en ils otels e restaurants da noss chantun forzas giuunas.

In suentermezdi en in otel

Per la campagna «Bündner Stars» èn Gastro Grischun e hotelleriessuisse Grischun, las duas organisaziuns sa drizza-

das a las scolas en noss chantun. La finamira da quella campagna è stada d'animar mats e mattas da far in emprendissadi en la gastronomia e da mussar a tuts che er in cuschinier sa daventar in star sco per exempel *Andreas Caminada*, l'enconuscent cuschinier grischun. Per animar ils giuuns da sa decider per ina professiun en la gastronomia han ils ultims nov mais 50 otels en noss chantun davert lur portas per scolaras e scolaras. In suentermezdi han ils 1200 scolaras e scolaras gi l'ocasiun da guardar davos las culissas dad in otel. Ultra da quai han els er gi la pussaivladad da guardar als cuschiniers, als cameriers ed a las dunnas che fan las chombras sur las spadlas.

Pli che be creativs

En connex cun l'acziun han las classes er gi l'ocasiun da sa participar ad ina concurrenza. En ina lavur libra han els pudì exprimer lur impressiuns fatgas durant il suentermezdi en quel otel che la classa ha visità. 25 lavurs han inoltrà las scolaras primaras cun las classes 4 fin 6 e 17 lavurs han ils scolaras e las scolaras da las scolaras superiuras inoltrà. Ier èn las lavurs vegnidas premiadas e quai dad ina giuria da num e pum. A quella han fatg part *Arnold Cramer*, gallerist, Cuira, *Felix Diet-*

rich, hotelier hotel «Waldhaus» Segl, *Rudolf Mirer*, pictur artist, Sursaisa. I saja stà tut auter che simpel da sa decider per las meglras trais lavurs. Felix Dietrich ha ditg ch'els scolaras e las scolaras sajan stads fitg creativs, hajan gi numerusas ideas e cunzunt er gronda fantasia. Ils experts han gi da far lur schelta tranter films, fotos, collaschas, musica, teater e lavurs fatgas a maun.

In vair success

Ier ha la giuria be valità las lavurs da las classes primaras. Per la valitaziun han els duvrà ils suandants criteris: originalità, realisaziun, grad da difficultad, creatividad e realità. Nus essan satisfats da las lavurs, ha accentuà Rudolf Mirer. Satisfats dal success da l'acziun èn cunzunt er ils iniziants, quai vul dir ils represchentants da Gastro Grischun e hotelleriessuisse Grischun, *Fluregn Fravi* e *Jürg Domenig*. Felix Dietrich è persuadi che l'acziun porta in di ils fritgs duaivels. Da quels 1200 scolaras e scolaras fan segir varsaquants in emprendissadi en la gastronomia. La meglra lavur ha fatg ina classa da Pany, la segunda meglra lavur è vegnida dad ina classa da Cuira e sin il terz post èn duas classes da Grischun.



Quai è la lavur dalla classa da Pany e quella lavur che ha a la fin persvas il pli fitg la giuria. Ina maisa radunda cun 11 giasts dal tat fin al beadi.



Ina classa da Flem ha fatg l'otel «Schweizerhof» da Lai e quai or da chartun.



Sche quels dus mats fan in emprendissadi da cuschinier san ele betg anc.



Paschair tar quels scolaras e scolaras che han gudagnà in premi.



Èn cuntents cun il success da l'acziun: Ils represchentants e las represchentantas da Gastro Grischun, Gastro Suisse e hotelleriessuisse Grischun *Jürg Domenig*, Paula Vetter, *Fluregn Fravi* e Tamara Henderson (da san.).



Quai è ina chombra dad in otel e fatg han ils scolaras la mobiglia da la chombra cun stgatlans da zulprins.